

Bosna i Hercegovina  
Federacija BiH  
Kanton Sarajevo  
Skupština Kantona Sarajevo  
n/r g. Mirza Čelik, Predsjedavajući Skupštine KS  
n/r Prof. dr. Rusmir Mesihović, Ministar zdravstva KS

## ZASTUPNIČKO PITANJE

24. Radna sjednica Skupštine Kantona Sarajevo

**Da li Ministar zdravstva Kantona Sarajevo namjerava samostalnije povesti brigu o građanima Kantona i grada Sarajeva u vrijeme svjetske pandemije, započeti sa organizovanom nabavkom testova i agresivnom kampanjom masovnog testiranja u Sarajevu kao najgušće naseljenom i najvećem gradu u zemlji, ili ima u planu zanemariti tu svoju dužnost i prepustiti to entitetskoj vladi, tj. Ministru zdravstva FBiH i federalnom Kriznom štabu?**

Obrazloženje: Direktor WHO za Evropu Hans Kluge i Vršiteljica dužnosti direktora za hitne operacije WHO za Evropu dr. Dorit Nitzan su izjavili da je Bosna i Hercegovina provela sve neophodne mjere na vrijeme i pohvalili su saradnju na tzv. **'blendiranom pristupu'** koji podrazumijeva **zaustavljanje, spriječavanje i informisanje javnosti**. No, istovremeno, viši savjetnik generalnog direktora WHO-a dr. Bruce Aylward kaže da je sada **najvažnije testirati, izolirati potencijalne slučajeve, pronaći kontakte i tako spriječiti daljnje širenje**, "to je mnogo efikasnije od zatvaranja cijelih gradova".

Mislim da se u KS ne radi dovoljno testova na dnevnoj bazi i da izvještaji govore o manjem broju zaraženih isključivo radi toga što se radi o malom broju testiranih. Broj zaraženih u poređenju sa brojem umrlih u BiH navode na zaključak da imamo najveću smrtnost u regiji, no mislim da je broj umrlih samo žalostan dokaz malog broja testiranih iz kojeg izvlačimo lažnu i pogrešnu sliku i o malom broju zaraženih. Mišljenja sam da je naročito važno testirati u glavnom i najvećem gradu BiH koji je i najgušće naseljeno područje u državi i da bi testiranje u ovom trenutku, ovoj sedmici epidemije, trebalo biti fokus ove Skupštine i Vlade, a naročito Ministra zdravstva KS.

Mi smo dobili povjerenje građana Sarajeva i naša jedina dužnost je briga o građanima Sarajeva. U ovom trenutku to je briga o javnom zdravlju i epidemiološkoj situaciji u Kantonu Sarajevo. Vlada Kantona, a ne vlada Federacije, je ta koja sada mora biti najbliža i najodgovornija građanima Sarajeva. Građani očekuju dodatan napor, posebne akcije i poseban odnos Skupštine i Vlade Kantona, a naročito kantonalnog ministra zdravstva prema njima, tim više što se Vlada Federacije u tehničkom mandatu pokazala nedovoljno odgovornom da samu sebe zaštiti od virusa pretvorivši se svojim neodgovornim ponašanjem u klaster naočigled javnosti.

Radi toga, kao zastupnik, ne želim ni na sjednicama SKS, ni u medijima slušati o tome šta je Vlada Federacije u tehničkom mandatu rekla, poručila, poduzela. Želim znati i slušati isključivo šta po pitanju **masovnog testiranja u Sarajevu** čini Vlada Kantona Sarajevo, tj. Ministar zdravstva KS.

Sarajevo, 23.04.2020. godine

SAMOSTALNI ZASTUPNIK

Damir Nikšić